



L I C E N S A

ЗА ОБАВЛЈАЊЕ ДЈЕЛАТНОСТИ
ПРИЈЕНОСА ЕЛЕКТРИЧНЕ ЕНЕРГИЈЕ

Л И Ц Е Н Ц А

ЗА ОБАВЉАЊЕ ДЈЕЛАТНОСТИ
ПРЕНОСА ЕЛЕКТРИЧНЕ ЕНЕРГИЈЕ

Registarski broj licence Регистарски број лиценце	05-28-12-191-21/22
Datum izdavanja licence Датум издавања лиценце	13. 12. 2022.
Naziv vlasnika licence Назив власника лиценце	“Elektroprijenos Bosne i Hercegovine” a.d., Banja Luka “Електропренос Босне и Херцеговине” а.д., Бања Лука
Adresa vlasnika licence Адреса власника лиценце	Marije Bursać 7a, Banja Luka Марије Бурсаћ 7а, Бања Лука
Porezni broj vlasnika licence Порезни број власника лиценце	4402369530009
Period važenja licence Период важења лиценце	1. 2. 2023. – 31. 1. 2033.

Predsjedavajući Komisije/Predsjedatelj Komisije/Предсједавајући Комисије

Suad Zeljković/Суад Зељковић

Članovi Komisije/Чланови Комисије

Nikola Pejić/Никола Пејић

Branislava Milekić/Бранислава Милекић



UVJETI ZA KORIŠTENJE LICENCE ZA OBAVLJANJE DJELATNOSTI PRIJENOSA ELEKTRIČNE ENERGIJE

Broj: 05-28-12-191-22/22

Naziv vlasnika licence: “Elektroprijenos Bosne i Hercegovine” a.d., Banja Luka

1. Opće odredbe

- 1.1. Licenca broj 05-28-12-191-21/22 je izdata u skladu sa Pravilnikom o licencama – Prečišćeni tekst (“Službeni glasnik BiH”, broj 63/16), a na osnovu zahtjeva “Elektroprijenosa Bosne i Hercegovine” a.d., Banja Luka broj 06-8968-13/22 od 6. jula 2022. godine, dopunjenog aktom broj 06-8968-15/22 od 26. augusta 2022. godine.
- 1.2. Licenca je izdata za period od 1. februara 2023. godine do 31. januara 2033. godine.

2. Obavljanje licencirane djelatnosti

- 2.1. Vlasnik licence je ovlašten da obavlja licenciranu djelatnost poštujući odredbe Zakona o prijenosu, regulatoru i operatoru sistema električne energije u Bosni i Hercegovini (“Službeni glasnik BiH”, br. 7/02, 13/03, 76/09 i 1/11), Zakona o osnivanju Kompanije za prijenos električne energije u Bosni i Hercegovini (“Službeni glasnik BiH”, br. 35/04, 76/09 i 20/14), u daljnjem tekstu: Zakon o osnivanju Kompanije za prijenos, kao i odredbe definirane u licenci. Ovo pravo se isključivo dodjeljuje vlasniku licence.
- 2.2. Vlasnik licence obavlja licenciranu djelatnost koristeći objekte date u prilogu ovih Uvjeta (Prilog 1 – Tabelarni prikaz objekata vlasnika licence u funkciji obavljanja licencirane djelatnosti). Prijenos električne energije i aktivnosti vezane za prijenos električne energije izuzetno se vrše i na objektima koji nisu u vlasništvu vlasnika licence (Prilog 2 – Tabelarni prikaz objekata koji nisu u vlasništvu vlasnika licence, a koji su neophodni za obavljanje licencirane djelatnosti).

Vlasnik licence u posebnom prilogu evidentira prijenosne objekte koji nisu u njegovom vlasništvu i nisu u funkciji prijenosa električne energije u BiH (Prilog 3 – Tabelarni prikaz dalekovoda koji nisu u vlasništvu vlasnika licence i nisu u funkciji prijenosa električne energije u Bosni i Hercegovini).
- 2.3. Bez izričitog odobrenja Državne regulatorne komisije za električnu energiju (DERK), vlasniku licence je zabranjeno da obavlja aktivnosti proizvodnje, isporuke, trgovine ili distribucije električne energije, ili bilo kojih djelatnosti koje su van djelokruga prijenosa ili djelatnosti vezanih za prijenos, u skladu sa Zakonom o osnivanju Kompanije za prijenos.
- 2.4. Obaveze definirane u licenci ne umanjuju obaveze vlasnika licence definirane zakonom.
- 2.5. Vlasnik licence ne može prestati obavljati ili izmijeniti licenciranu djelatnost bez prethodnog odobrenja od DERK-a.

3. Obaveze i prava vlasnika licence

- 3.1. Vlasnik licence je dužan da permanentno radi na ispunjavanju ovih Uvjeta, te uvjeta utvrđenih Pravilnikom o licencama. Na zahtjev DERK-a, vlasnik licence je dužan pružiti dokaz o ispunjenju pojedinih uvjeta.
- 3.2. Vlasnik licence je dužan da redovno, kao i po zahtjevu DERK-a, dostavlja finansijske i ostale izvještaje u obliku i obimu definiranom ovim Uvjetima ili zahtjevom DERK-a.
- 3.3. Vlasnik licence je dužan da vodi računovodstvene knjige i priprema finansijske izvještaje, koje čini dostupnim javnosti, za licenciranu djelatnost u skladu sa računovodstvenim standardima koji važe u Bosni i Hercegovini i u skladu sa odredbama koje propiše DERK.
- 3.4. Vlasnik licence je dužan da provodi sve domaće, regionalne i međunarodne propise koji se odnose na prijenos električne energije, kako sa tehničkog tako i sa komercijalnog aspekta i prati dešavanja u Energetskoj zajednici. Prije usklađivanja poslovanja sa promjenom domaćih, regionalnih ili međunarodnih komercijalnih ili tehničkih zahtjeva vezanih za prijenos električne energije, vlasnik licence mora obavijestiti DERK o tim promjenama i dobiti njegovo odobrenje.
- 3.5. Vlasnik licence je obavezan da primjenjuje propise da bi uskladio tehnički rad prijenosne mreže sa zahtjevima i standardima Evropske mreže operatora prijenosnog sistema za električnu energiju (*European Network of Transmission System Operators for Electricity – ENTSO-E*).
- 3.6. Vlasnik licence je dužan poštivati važeće propise vezane za kvalitet usluga, kao i propise iz ove oblasti koje donese DERK. Vlasnik licence je dužan da prati kvalitet snabdijevanja električnom energijom u dijelu koji se odnosi na kvalitet napona, odnosno njegovu usklađenost sa važećim standardima.
- 3.7. Vlasnik licence imenuje svoje predstavnike u tehničke komisije koje osniva Nezavisni operator sistema u Bosni i Hercegovini (NOS BiH) u skladu sa Mrežnim kodeksom, Tržišnim pravilima i pravilima o radu tehničkih komisija. Oni aktivno učestvuju u radu tehničkih komisija koje utvrđuju prijedloge izmjena i dopuna Mrežnog kodeksa, Tržišnih pravila i tehničkih standarda.
- 3.8. Vlasnik licence je dužan da obavlja licenciranu djelatnost u skladu sa Mrežnim kodeksom, Tržišnim pravilima, tehničkim standardima, operativnim planiranjem, uputstvima za dispečiranje, planom održavanja i planovima proširenja mreže.
- 3.9. Vlasniku licence nije dozvoljeno da provodi bilo kakve antikonkurencijske aktivnosti, zloupotrebljava tržišnu moć ili vrši manipulacije tržištem električne energije.
- 3.10. Vlasnik licence je dužan da svoje usluge pruža na fer i nediskriminirajući način.
- 3.11. Vlasnik licence je dužan da se pridržava odluka NOS-a BiH kada se, u skladu sa zakonom i licencom za aktivnosti nezavisnog operatora sistema, pod hitnim okolnostima koje zahtijevaju brzo djelovanje, mijenja Mrežni kodeks ili Tržišna pravila.
- 3.12. Vlasnik licence je dužan da poštuje mjere koje propiše DERK ili Ministarstvo vanjske trgovine i ekonomskih odnosa Bosne i Hercegovine u slučaju prirodne katastrofe ili druge situacije sa posljedicama po opću sigurnost.

- 3.13. Vlasnik licence je dužan da poštuje sve odredbe važećih međunarodnih sporazuma i ugovora čiji je potpisnik Bosna i Hercegovina, a odnose se na prijenos električne energije, uključujući, ali ne ograničavajući se na, važeća pravila koja se odnose na prekograničnu trgovinu električnom energijom.
- 3.14. Vlasnik licence je dužan da omogući ravnopravan pristup elektroprijenosnoj mreži za sve snabdjevače električnom energijom koji imaju fizički pristup sistemu i da poštuje važeća pravila za pristup sistemu.
- 3.15. Vlasnik licence je dužan poštovati odluke o tarifama, te Pravilnik o tarifnom postupku (“Službeni glasnik BiH”, broj 44/05) i Metodologiju za izradu tarifa za usluge prijenosa električne energije, nezavisnog operatora sistema i pomoćne usluge – Drugi prečišćeni tekst (“Službeni glasnik BiH”, broj 68/21).
- 3.16. Vlasnik licence je dužan poštovati sve primjenjive tehničke standarde i komercijalne kodekse. Bilo koja od tih tehničkih ili komercijalnih praksi može se proširiti, ukinuti ili zamijeniti samo uz odobrenje DERK-a.
- 3.17. Vlasnik licence se može baviti prijenosom i djelatnostima vezanim za prijenos u susjednim elektroenergetskim sistemima, pod uvjetom da su te djelatnosti direktno vezane za poboljšanje djelatnosti prijenosa i svih drugih djelatnosti vezanih za prijenos u Bosni i Hercegovini i susjednim elektroenergetskim sistemima. Vlasnik licence je dužan da o svim aktivnostima koje provodi u susjednim elektroenergetskim sistemima obavijesti DERK. Ovo obavještenje mora da sadrži obrazloženje opravdanosti angažiranja u susjednim elektroenergetskim sistemima.
- 3.18. Vlasnik licence je dužan da vodi posebne račune za djelatnost prijenosa od drugih djelatnosti na način i u obimu specificiranom licencom ili pravilima koje propiše DERK.
- 3.19. Vlasnik licence ne smije da vrši izmjene u mreži takve prirode koje utječu na kompatibilnost mreže sa proizvođačima, distributivnim i susjednim prijenosnim mrežama, kao i postrojenjima u vlasništvu trećih lica, na način da ugrožava opću sigurnost i sigurnost snabdijevanja.
- 3.20. Vlasnik licence je dužan da u skladu sa Mrežnim kodeksom rukovodi, održava (uključujući popravke i zamjene ako je potrebno) i štiti svoju mrežu kako bi osigurao pouzdan i siguran prijenos električne energije, vodeći pri tom računa i o principu ekonomičnosti i produktivnosti u radu.
- 3.21. Vlasnik licence je dužan da planira proširenje i razvoj sistema da bi se zadovoljile potrebe potrošača, pri čemu treba da usklađuje planiranje razvoja svoje mreže sa drugim mrežama i susjednim sistemima.
- 3.22. Vlasnik licence svake godine izrađuje dugoročni plan razvoja prijenosne mreže za period od 10 godina, koji obuhvata i problematiku novih prekograničnih vodova, i o svim fazama pravovremeno i sveobuhvatno informira DERK. Ovaj plan se dostavlja NOS-u BiH na pregled, direktnu reviziju i odobrenje. Prije odobrenja vlasnik licence zajedno sa NOS-om BiH organizira javnu raspravu o revidiranom dugoročnom planu. Plan koji je odobrio Upravni odbor NOS-a BiH do kraja oktobra dostavlja se DERK-u na odobrenje, a nakon odobrenja DERK-a objavljuje ga NOS BiH. Indikativni plan razvoja proizvodnje koristi se kao jedna od osnova za izradu dugoročnog plana razvoja prijenosne mreže.

- 3.23. Vlasnik licence je dužan da na osnovu dugoročnog plana razvoja prijenosne mreže izradi godišnji investicijski plan i dostavi ga DERK-u na odobrenje do kraja novembra za narednu godinu.
 - 3.24. Vlasnik licence, u saradnji sa NOS-om BiH, učestvuje u planiranju i analizama efekata novih interkonektivnih vodova na regionalnom nivou i učestvuje u izradi Evropskog plana razvoja prijenosne mreže za narednih deset godina (*Ten-Year Network Development Plan – TYNDP*). Analize se odnose na naponske nivoe 400 kV i 220 kV.
 - 3.25. Vlasnik licence je dužan da postrojenja i vodove projektuje, gradi i koristi tako da efekat njihovog korištenja ne ugrožava zdravlje stanovništva odnosno područja, i koji u najmanjoj mogućoj mjeri mijenjaju prirodno okruženje i vrijednost pejzaža.
 - 3.26. Vlasnik licence je dužan poštivati pravila ili standarde vezane za zonu sigurnosti, koja se uspostavlja u cilju zaštite objekata i opreme vlasnika licence, te zaštite stanovništva.
 - 3.27. Vlasnik licence je dužan da do kraja februara podnese zahtjev za ažuriranje priloga navedenih u tački 2.2. ovih uvjeta sa stanjem na dan 31. decembra prethodne godine, ukoliko je došlo do izmjene njihovog sadržaja. Uz zahtjev za ažuriranje prilaže se upotrebna dozvola sa pratećom dokumentacijom, kao i ažurirana karta elektroenergetskog sistema. O svim izmjenama vlasnik licence obavještava DERK i u vrijeme nastanka izmjene.
 - 3.28. Vlasnik licence je dužan na svojoj internet stranici objaviti sve relevantne informacije i podatke koji se odnose na licenciranu djelatnost, a koje su potrebne korisnicima elektroprijenosnog sistema ili su od javnog interesa. Objave na internet stranici se vrše na jezicima u službenoj upotrebi u Bosni i Hercegovini, kao i na engleskom jeziku.
4. Nadgledanje obavljanja licencirane djelatnosti
 - 4.1. DERK nadgleda obavljanje licencirane djelatnosti.
 - 4.2. Vlasnik licence dostavlja DERK-u izvještaje navedene u ovim uvjetima ili po zahtjevu DERK-a tokom perioda važenja licence.
 - 4.3. DERK nadgleda sve aspekte usklađenosti djelovanja vlasnika licence sa uvjetima licence, kao i svim odredbama relevantnih zakona i propisa DERK-a.
 - 4.4. DERK može pokrenuti hitni postupak u cilju reagiranja na osnovanu sumnju o povredi obaveza iz licence, na svoju inicijativu ili kao odgovor na zahtjev bilo kojeg lica.
 - 4.5. DERK vrši najavljene i nenajavljene preglede objekata i dokumenata vezanih za licencirane aktivnosti. DERK ima pravo pristupa objektima vlasnika licence, ili objektima kojima upravlja vlasnik licence, prostorijama vlasnika licence, njegovoj opremi, dokumentima, poslovnim knjigama i arhivi kako bi izvršio pregled licencirane aktivnosti. Vlasnik licence DERK-u pruža svaki vid pomoći zatražen u toku pregleda.
 - 4.6. Vlasnik licence obavještava DERK o svakoj povredi uvjeta za korištenje licence u roku od sedam dana od saznanja vlasnika licence da je došlo do povrede

5. Dostavljanje podataka i izvještaja
 - 5.1. Vlasnik licence dostavlja izvještaje DERK-u na način kako je definirano licencom, kao i izvještaje po posebnom zahtjevu DERK-a, na način i u formi koju propiše DERK.
 - 5.2. U roku od 90 dana po isteku fiskalne godine, vlasnik licence DERK-u dostavlja svoj godišnji izvještaj o poslovanju za tu fiskalnu godinu. Revidirani finansijski izvještaj se dostavlja u roku od 180 dana po isteku fiskalne godine.
 - 5.3. Vlasnik licence dostavlja DERK-u godišnji izvještaj o ličnim interesima članova Upravnog odbora Kompanije u bilo kojoj drugoj instituciji, bilo da su vlasnici ili nosioci određene funkcije ili imaju neki drugi lični interes, bez obzira da li ih ovi interesi mogu dovesti ili ne u sukob sa interesima Kompanije, u skladu sa članom 34. Zakona o osnivanju Kompanije za prijenos, do kraja januara za prethodnu godinu.
 - 5.4. Vlasnik licence priprema i dostavlja DERK-u mjesečni izvještaj o radu koji između ostalog sadrži izvještaj o realizaciji plana održavanja, izvještaj o realizaciji plana investicija i izvještaj o vanrednim pogonskim događajima, kao i izvještaj o pogonskoj spremnosti objekata za naredni mjesec.
 - 5.5. Vlasnik licence priprema i dostavlja DERK-u godišnji izvještaj o radu do kraja februara za prethodnu godinu. U godišnjem izvještaju su sumirani mjesečni izvještaji i dat osvrt na rad prijenosne mreže u prethodnoj godini.
6. Obnova, izmjena, suspenzija ili ukidanje licence
 - 6.1. Vlasnik licence je dužan podnijeti zahtjev za obnavljanje licence u skladu sa rokom definiranim u Pravilniku o licencama.
 - 6.2. Tokom perioda važenja licence, na zahtjev vlasnika licence ili na inicijativu DERK-a, moguće je otvoriti proces redefiniranja licence kako bi se uskladili uvjeti licence sa značajnim promjenama u zakonu ili činjeničnim okolnostima, a u skladu sa Pravilnikom o licencama.
 - 6.3. Suspenzija ili ukidanje licence se obavlja pod uvjetima, u slučajevima i na način određen Pravilnikom o licencama.
7. Regulatorna naknada
 - 7.1. Vlasnik licence je dužan da u periodu važenja licence plaća regulatornu naknadu u skladu sa odlukama DERK-a.
 - 7.2. Vlasnik licence ima pravo da uračuna regulatornu naknadu u okviru tarife za usluge prijenosa električne energije, koju donosi DERK.
8. Sankcije
 - 8.1. Ukoliko se vlasnik licence ne pridržava uvjeta iz licence ili zakona, primijenjuju se kaznene odredbe predviđene zakonom.
 - 8.2. DERK može da vlasniku licence dostavi administrativno obavještenje o povredi i pozvati ga na administrativno poravnanje povodom povrede licence od strane vlasnika iste, prije nego što se primijene kaznene odredbe.
 - 8.3. Prije primjene mjere iz tačke 8.2, u slučajevima kada to okolnosti dozvoljavaju, DERK pisanim putem vrši opomenu vlasnika licence i određuje rokove za otklanjanje nedostataka.

- 8.4. DERK prilikom sankcioniranja može koristiti mogućnost suspenzije ili ukidanja licence u skladu sa Pravilnikom o licencama.
9. Rješavanje sporova
 - 9.1. Rješavanje sporova vezanih za provođenje uvjeta licence se vrši u skladu sa Poslovníkom o radu DERK-a (“Službeni glasnik BiH”, broj 2/05) i Pravilnikom o javnim raspravama (“Službeni glasnik BiH”, broj 38/05).
 - 9.2. Ako je nezadovoljan odlukom DERK-a, vlasnik licence može podnijeti tužbu na odluku DERK-a Sudu Bosne i Hercegovine.
10. Odredbe o obavještanju
 - 10.1. Adresa vlasnika licence koja se koristi u svrhu dostavljanja obavještenja je: “Elektroprijenos Bosne i Hercegovine” a.d., Banja Luka, Marije Bursać 7a.
 - 10.2. Vlasnik licence može promijeniti svoju adresu koja se koristi u svrhu dostavljanja obavještenja, ali o tome mora unaprijed obavijestiti DERK. Za izmjenu adrese koja se koristi u svrhu dostavljanja obavještenja nije potrebno vršiti izmjenu licence.
11. Prilozi
 - 11.1. Sastavni dio ovih Uvjeta su:
 - Prilog 1 – Tabelarni prikaz objekata vlasnika licence u funkciji obavljanja licencirane djelatnosti (dalekovodi, trafostanice i rasklopna postrojenja),
 - Prilog 2 – Tabelarni prikaz objekata koji nisu u vlasništvu vlasnika licence, a koji su neophodni za obavljanje licencirane djelatnosti, i
 - Prilog 3 – Tabelarni prikaz dalekovoda koji nisu u vlasništvu vlasnika licence i nisu u funkciji prijenosa električne energije u Bosni i Hercegovini.